



Preziai geniturs, prezia interessai

Igl onn da scola 2021/22 stat avon porta. Quei onn stat vinavon sut l'enzenna da Covid-19. Per reussir en quei temps essan nus visai al sustegn ed alla collaboraziun da tut ils involvai. Ultra da quei entscheiva cun quei onn da scola era il niev quantum da 39 jamnas instrucziun.

Il Consorzi da scola Sumvitg-Trun (CSST) ei frestgs dad in niev tgamun che consista da treis meinapartiziuns. Ils meinapartiziuns selegnan ed ein plein slontsch per la nova sfida.

Suenter otg onns ei il CSST sedecidius dad adattar ils uordens ed ils reglaments dil menaschi al temps. Nus selegrein d'astgar introducir tals en quei onn da scola per saver garantir ina buna convivenza.

Il scalem superiur dil CSST vegn ad introducir pliras mesiras per migliorar il clima da scola e dall'instrucziun. Per reussir en quella sfida ei la collaboraziun da tuts involvai necessaria.

Nossa preziada presidenta dil CSST, Erica Cavegn-Pfister, ha astgau selegrar ensemen cun sia famiglia dall'arrivada da Luana, lur tierz affon. Il CSST admetta sinceras gratulaziuns e giavischa all'entira famiglia bia bials e plascheivels muments.

Jeu giavischel a vus tuts ina bun'entschatta dil niev onn da scola.

Salids cordials

per il CSST


Salvatore Stagliano

meinapartiziun dalla superiura





Midadas da persunal

Cordial beinvegni a nossas treis novas personas d'instrucziun.

Cun Regina Giger, sesenta a Segnas, havein nus gia astgau collaborar el decuors digl onn da scola vargau. Naven da quest onn da scola ei Regina engaschada sco pedagoga curativa. Ella vegn a sustener nossas scolaras e nos scoalars dil ciclus 1, pia dalla scoletta entochen la 2. classa primara.

Sandra Tschuor, sesenta a Surrein, instruescha gia dapi entgins onns la promoziun da lungatg per nossas scolaras e nos scoalars. Naven da quest onn da scola ei Sandra engaschada sco persona d'instrucziun al scalem superiur.

Il team dalla scoletta Trun vegn sustenius quest onn da scola cun la mussadra da scoletta Isabelle Defuns, sesenta a Trun. Cunquei ch'il diember dallas duas annadas da scoletta dumbra ensemen 20 scolarettas e scolarets vegn la scoletta menada mintgamai la gievgia avon miezdi en duas gruppas.

Nus giavischein ad ellas ina bun'entschatta e selegrein d'astgar collaborar cun ellas.

Niev ciclus d'evaluaziun entras igl inspecturat, 2020-2024

Igl onn da scola vargau ha il Consorzi saviu serrar giu l'evaluaziun entras igl inspecturat. Sco gia menziunau pirlas gadas vegnan differentas mesiras integradas el mintgadi da scola.

In ciclus d'evaluaziun risguarda mintgamai quater onns da scola, pia cuoza la proxima evaluaziun entochen igl onn da scola 2023/24. Il focus da quest'evaluaziun ei treis dils novs roms tenor il plan d'instrucziun 21, numnadamein il rom ELT (economia, lavur e tenercasa), il rom IND (individualisaziun) sco era il rom ERC (etica, religiuns e cuminonzas).

Tests da spida en scola

Il Cantun ha decidiu da dar vinavon la pusseviltad allas scolas da cuntinuar culs tests da spida en scola, prevedentamein entochen primavera proxima.

Las informaziuns dil Cantun allas scolas ein vegnidas distribuidas a cuorta vosta, per quei motiv entscheiva il Consorzi culs tests da spida naven dalla secunda jamna da scola.

Informaziuns detagliadas vegnan repartidas el decuors dall'emprema jamna da scola.

Ils meinapartiziuns

Il Consorzi da scola vegn menaus quest onn entras ils treis meinapartiziuns. Tuts treis restan vinavon en uffeci sco personas d'instrucziun.

Las reponsablads ein repartidas sco suonda:

- Scalem primar Trun: André Walther (pt.meinapartiziun@scolasumvitgtrun.ch)
- Scalem primar Rabiun: Leci Jacomet (pr.meinapartiziun@scolasumvitgtrun.ch)
- Scalem supeiur: Salvatore Staglianò (sup.meinapartiziun@scolasumvitgtrun.ch)

Vessess Vus dad esser malsegirs nua s'annunziar sche astgeis secapescha era contactar l'administraziun (administraziun@scolasumvitgtrun.ch). Vies messadi vegn allura vigliaus vinavon tier il meinapartiziun responsabel.



Investa ella lavur dil secretariat

Il 4 da matg 2015 ei stau miu empren di da lavur. Pulit agitada, mo plein anim, haiel entschiet mia nova piazza. El fratemp ein dapli che 6 onns vargai – bugen prendel quella caschun per dar a vus ina cuorta investa ella lavur dil secretariat.

La lavur el secretariat ei fetg varionta, nua ch’il computer ei il pli impurtont utensil. Sco secretaria haiel contact cun las differentas parts ch’ei involucadas el menaschi da scola, denter auter setracta ei da scolarAs, geniturs, personas d’instrucziun, inspecturat, manischunzs, pedels, responsabels dallas differentas parts digl uffeci da sport e dalla scola populara e cunzun ils meinapartiziuns ed il Cussegl da scola. La collaboraziun culs meinapartiziuns ei centrala ed ina comunicaziun aviarta ei indispensabla. Il secretariat duei levgiar, descargar e sustener ils meinapartiziuns sco era il Cussegl da scola tier lur lavur operativa resp. strategica. La lavur administrativa d’in menaschi da scola ei s’augmentada pulitamein ils davos onns, lavur ch’ei per gronda part buca veseivla anoviar.

Per da tuttas situaziuns sto vegnir inoltrau ina statistica resp. menau ina survesta. Cunzun all’entschatta ed alla fin digl onn da scola ein talas lavurs, che s’audan buca gest tier mias lavurs favorisadas, da liquidar. Per ch’ins impundi, cunzun alla fin digl onn da scola, buca memia bia temps per talas lavurs eis ei d’engrau ch’ins nodi gia duront igl onn mutaziuns da scolarAs, midadas da nivel, midadas d’urari, eav.

Ina dallas lavurs preparatorias d’in onn da scola ei la rimnada e l’evaluaziun dallas annunzias per las structuradas dil di. Las informaziuns pil niev onn da scola survegnan ils geniturs e lur affons gia alla fin digl onn da scola. Duront la stad ha ei num rimnar tuts taluns d’annunzia e da ressumar las annunzias tier ina survesta. Questa survesta survecha silsunter per plirs puncts, sco p. ex. la meisa da miezdi, la survegionza en cass d’absenza d’ina persona d’instrucziun, per numnar dus sils puncts.



Secapescha havess ei aunc in tschuat autras incaricas che valessen da presentar – mo per oz lascheljeu cumbien. Jeu schazegel fetg la lavur el secretariat, gest perquei ch’ella ei aschi varionta. Ella dat a mi bia satisfacziun e fa plascher. Jeu sesentel bein el team dil CSST. Cheutras admettel a Vus tuts in “Engraziel fetg” per la buna collaboraziun!

Per il niev onn da scola giavischel a nossas scolaras ed a nos scolar e lur geniturs ina bun’entschatta, a nossas personas d’instrucziun bia plascher cun lur scolar e che lur planisaziun per l’instrucziun reusseschi sco giavischau ed al Cussegl da scola ch’il cuntegn da lur sesidas seigi buca memia pensonts.

cordialmein salidel Vus

la secretaria

Rita Wolf

CONSORZI DA SCOLA SUMVITG-TRUN



NOVITADS DA SCOLA

INFORMAZIUNS

Termins

24 d'ust	entschatta dils tests da spida jamnils
30 d'ust – 3 da settember	meil da pausa
31 d'ust	controlla entras la dentista
naven dils 7 da settember	instrucziun da senudar
20 – 24 da settember	jamna d'events dil scalem superiur
27 da settember – 1. d'october	meil da pausa
11 – 22 d'october	vacanzas d'atun
1. da november	numnasontga (liber)
24 da november	conferenza romontscha (scolarAs han liber)
23 da december – 5 da schaner	vacanzas da Nadal

Contacts

Ils meinapartiziuns ein contonschibels suandontamein:

- André Walther
gliendisdis, 15:00 – 16:00, sut 081 936 33 04
ni per mail sut: pt.meinapartiziun@scolasumvitgtrun.ch
- Leci Jacomet
gliendisdis, 15:00 – 16:00, sut 081 943 17 11
ni per mail sut: pr.meinapartiziun@scolasumvitgtrun.ch
- Salvatore Staglianò
gliendisdis, 15:00 – 16:00, sut 081 936 33 04
ni per mail sut: sup.meinapartiziun@scolasumvitgtrun.ch

Il secretariat dil Consorzi da scola sesanfla ella casa da scola a Trun. Las uras da spurtegl ein per regla sco suonda:

gliendisdis e gievgia: 08:00 - 12:00 e 13:30 - 16:00

En cass d'absenza da scolarAs muort maldispostadad astgeis Vus bugen era deponer Vies messadi silla pindella sut il numer 081 936 33 04.

Las proximas novitads da scola cumparan il december!